

欽定剿平粵匪方略

欽定勦平粵匪方略卷一百九十 戊午年

三月初一日

丁丑勝保袁甲三奏言 臣勝

圍固逆匪自二月初二日連獲勝仗後該逆時
思攻陷固城復於二月初九十一十四等日在
城東南隅開挖地道用地雷震塌城垣數丈各
營併力搶護得以化險爲平 臣復親督各軍進
攻比關賊巢各逆列隊土岡約有三三萬人我

兵奮力迎戰斃賊數百人該逆被勦堅伏巢中
既困固城又窺西路十九日探有馬步逆匪二
千餘人竄光州所屬之馬岡集等處署總兵龍
澤厚營總景林等帶馬步各隊迎擊行至馬岡
河東殺賊三四百名淹斃百餘名追殺二十餘
里二十一日派佐領高福帶領馬隊隨同布政
使李孟羣進勦由北而南兩路衝擊斃賊甚多

該逆知城中困乏意欲持久以待內潰卽力踞
固始分撲光商臣激勵將士懸以重賞剋期大
舉二十三日臣親督馬步各隊分路進攻逆匪
傾巢出撲河北鎮總兵樂善領軍迎勦斃悍賊
數百名又斃騎馬賊首數名逆衆向東關逃竄
我兵一面緊追一面直撲賊壘殺賊二千餘人
立將觀音閣一帶賊巢焚燬河東來援之賊又

經我軍迎勦殺戮殆盡其西北三仙莊及各壘
賊匪相率死守各軍乘勝攻撲遊擊盧又熊亦
帶隊趕到偪賊環攻踰溝破壘捨斬無遺西面
一帶賊巢亦被我兵踏平適李孟羣督帶廣勇
由西面進兵見大軍業已得手愈形踴躍都司
陳添潤帶勇擁進西大廟立將賊營攻破參將
曾秉忠知縣張曜等齊力夾勦約斃逆匪二千

餘名南路竄出零股被副將趙鴻舉伏兵掩擊頗有斬擒臣揮令各軍分路繞城勦洗該逆或併歸巢中或分途亂竄均被我兵奮擊又斃賊三四千名立將環城賊壘二十餘處一律平毀擒斬僞額天侯卜占魁等三百餘人是日各路進攻酣戰五時之久徑擣賊巢統計殺賊一萬餘名生擒一千餘人潰匪向東南逃竄當飭馬

隊官兵涉河追勦又斃千餘名將河東一帶賊
巢全行平毀查該逆本係積年粵賊糾合大股
數萬圍困固城已踰兩月之久經臣帶兵援勦
幸仗

皇上天威將士用命一戰而捷立解城圍實非臣所敢
豫料其尤爲出力之河北鎮總兵樂善職分較
大未敢仰邀

恩施協領楚勒剛阿擬請

賞加副都統銜協領景林佐領高福都司唐玉輝均擬

請

賞加勇號守備黃得魁擬請以都司補用並

賞換花翎五品頂戴文桂擬請

賞戴花翎候補直隸州知州署固始縣知縣張曙擬請

免補直隸州知州以知府留於河南補用縣丞

田玉梅擬請免選本班以知縣留於河南歸候
補班補用並

賞換花翎其餘出力文武員弁兵勇容俟查明覈實保
奏奏八

上諭內閣曰此股賊匪數以萬計圍城兩月有餘經勝
保督兵赴援屢獲大勝遂解城圍實屬謀勇兼備調
度有方勝保著加恩遇有都統缺出由軍機處提奏

並賞還黃馬褂及霍變巴圖魯名號其尤爲出力之
總兵樂善著遇有提督缺出由軍機處提奏並賞穿
黃馬褂協領楚勒剛阿著賞加副都統銜景林著賞
給齊訥格爾克克巴圖魯名號佐領高福著賞給幹
勇巴圖魯名號都司唐玉輝著賞給禦勇巴圖魯名
號守備黃得魁著以都司補用並賞換花翎五品頂
戴文桂著賞戴花翎候補直隸州知州署固始縣知

縣張曜著免補直隸州知州以知府留於河南補用
縣丞田玉梅著免選本班以知縣留於河南歸候補
班備用並賞換花翎其餘出力員弁兵勇著勝保等
查明保奏候朕施恩所有敗殘餘匪仍著督飭將士
分路搜剿毋留餘孽

同日福興奏言二月初九初十等日清河灣賽
家埠等處匪衆屢次搶渡撲犯河干圖擾廣信

郡城經水陸各軍先後擊退擒斬甚多十三日
鉛山賊股四五百人竄至郡城南岸之東瓦窰
地方彘擁槍渡臣卽分撥兵勇數百名馳往扼
截將匪擊退卽梟水至南岸奮擊該逆紛紛敗
走殲賊一百四十餘名維時上游靈溪砍石渡
各處皆分布隊伍豫防該匪見無隙可乘遂會
合山後大股盡竄沙溪查沙溪爲信郡至玉山

必由之地駐防該處之黃岡果勝等營本係臣
派往會援廣豐之軍因饒廷選退紮玉山未及
合兵前進探聞大股賊匪盡趨此路都司馮日
坤等遂督各營梟水過河進攻逆黨七八千人
亦分股抗拒我軍分隊從左路山脊潛進自上
橫衝而下賊卽潰亂斬獲百餘名臣因沙溪一
帶淺灘甚多復就郡城內抽調兵勇循靈溪而

上加意嚴防兼爲沙溪各營聲援十四日另有賊衆數千仍從鉛山竄抵東瓦窰經臣派隊擊退是日沙溪官軍復從下游渡河迎勦斃賊二百餘名生擒十七名訊據獲賊供稱係由新淦經石逆調至東路全數上犯現在撫郡惟留廣賊千餘人建郡不過數百人隨後亦將東竄欲陷信郡由浙省以援金陵等語查信防軍力無

多必須東西兼顧方免擾及完善赴援之彰武
奇兵等營僅有一千數百名不敷分布刻下東
路情形喫重亟須添撥勁旅應請

飭下江西撫臣耆齡迅速撥兵數千名馳赴廣信會剿
奏八

上命軍機大臣傳諭福興耆齡曰江西逆匪全趨東路
福興兵力尙單亟須援應况賊衆分竄饒廷選退守

玉山該處爲入浙要路儻令關入浙江蹂躪完善之區大局幾不可問著者齡迅派得力大員帶兵馳赴廣信一帶探明賊勢相機截勦賊匪傾巢而出已由廣豐將至玉山福興亦未可株守信郡專待援兵致令浙境稍有疏虞

初二日

戊寅

官文都興阿胡林翼奏言臣等前因

固始被圍商城告警於九江圍城各營抽調三

千人又於興國防兵抽調五百人隨同舒保馬
隊二百人援應商城半月以來皖賊大股上犯
宿松太湖之賊竄聚張家塆陳德園地界連營
數十座英山霍山之賊竄入羅田邊境蘄水蘄
州警報疊至都興阿馬隊千餘名久戰力疲屢
以兵單爲慮臣等現飭道員李續宜另募湘軍
數千人擬俟成隊卽會合舒保由商城進剿乃

勝保屢札舒保由光固分兩路前進查舒保既
駐商城又欲其由光固分路迎勦則商城六安
一路豈可委棄不顧皖省粵逆分股上竄每股
不下一二萬人若不力遏北岸賊援則九江功
敗垂成皖省更無肅清之日臣愚以爲責成舒
保審察商城六安固始各路賊情相機進取如
皖省賊警蘄黃兵單仍須取道麻城羅田以免

都興阿大隊牽動庶不致膠滯一隅貽誤全局
奏八

上命軍機大臣傳諭官文都興阿胡林翼曰現在固始
之賊疊經勝保等督兵勦擊已解城圍英霍賊匪現
已竄入羅田邊境窺伺蘄水蘄州都興阿兵力單薄
楚省軍情較爲喫重著官文等卽飭舒保一軍仍回
羅田麻城一帶會同都興阿實力防勦以顧楚省門

官文都興阿胡林翼又奏言據湖北糧道唐訓方稟稱二月初六七等日太湖之賊在安仁河一帶築壘初八日分股上撲我軍攻其不備殺賊二百餘名安仁河一帶未成之壘悉行埽平初十日賊由安仁河至蘄州之黃泥畷守備梁洪勝督軍逼近賊巢擒獲偽丞相韋潮綱衆賊

擁至我軍四面合攻團勇從山巔壓下賊衆大潰追殺六七里平壘七座斃賊千餘名十二日該匪萬餘復由黃花嶺竄望天畷撲皖之英山縣城臣都興阿派參將富森保德明等前往應援十三日各營兵勇攻賊於青天畷平壘八座焚斬殆盡是日唐訓方親赴牛頭沖一帶率各營分路前進十四日直趨南陽河賊於北岸依

山築壘我軍將抵南岸賊亦渡河而南都司余
際昌乘賊半渡擊之轟溺多名後渡之賊分股
包抄知縣丁銳義等分投截擊殲斃賊目三人
餘賊鳧水而逸我軍潛渡下游繞伏北岸山谷
間俟全軍北渡偏近賊壘拋擲火器破壘三座
羣賊紛至救援山後伏軍齊出賊遂大敗平壘
二十九座斃賊一千數百名生擒一百三十七

名陣斬僞倚天侯陳士棠等多名此次太湖南
陽河賊匪盤踞數月疊經懲創實足寒賊膽而
振軍威所有連次獲勝尤爲出力文武各員先
行開列仰懇

天恩分別獎勵陣亡教諭王炳榮請交部從優議卹其
餘在事兵勇可否擇尤保獎出自

聖裁奏入

上諭內閣曰此次該員弁等以少擊衆均獲大勝自應先加獎勵湖北糧儲道唐訓方著賞給奇齊葉勒特依巴圖魯名號知縣丁銳義著免補本班以同知儘先補用都司余際昌張嵩齡均著免補都司以遊擊儘先補用余際昌並賞加參將銜把總楊作霖著以守備儘先補用並賞加都司銜賞換花翎守備梁洪勝張養吾朱恢三均著免補守備以都司儘先補用

並賞加遊擊銜賞換花翎其餘出力兵勇著准其擇
尤保奏陣亡教諭王炳榮著交部從優議卹

同日德興阿翁同書翰殿華奏言十二日江浦
陸軍參將鄧鳳林等帶兵進攻求兩山之西南
燒燬賊棚二座斃賊三四十名維時富明阿督
帶營總常壽等會攻求兩山賊壘亦斃賊數十
名燒燬賊卡七座賊棚四座都司王雲慶副將

趙樹棠等各帶弁兵分攻南門外賊壘均有斬獲約計斃賊二百餘名至江浦所轄江面各要隘初十至二十一等日經水師攻剿擊沈賊船數隻斃賊甚多現在江浦之賊惟恃九洲賊巢盤踞江心暗通金陵消息臣等現已整軍進剿步步爲營斷其外援絕其糧道並移營浦口與和春等函商勦辦期於大局有裨奏入報

初五日

辛巳

胡林翼奏言臣准江西布政使龍啟

瑞函稱粵逆石達開竄踞江西之鉛山河口地方賊數約在二萬以外欲竄浙江將軍福興退守廣信府城按兵不動二月初四日賊破廣豐經總兵饒廷選擊退賊尙盤踞離城三十里之洋口及上饒十五里之阜頭一帶河口之賊於

二月初一二日盡數東竄等語查鉛山廣豐上饒俱屬廣信緊偏玉山玉山爲江西入浙通衢石逆旣竄廣豐勢必窺伺浙江該省防務極形喫緊將軍福興統帶兵勇現在廣信城中如賊由該郡直趨浙江恐亦未能追勦查有道員李元度屢著戰功上年九月以數千人守貴溪孤城當數萬悍賊卒能保全無患該員現紮江西

貴溪地方若使繞道赴浙趨出賊前防勦必能
得力仰懇

天恩飭下李元度卽率所部兵勇前赴浙江擇要扼守
以遏賊蹤該營勇丁約四五千入月餉約需三
萬兩請

旨飭下浙江巡撫按月接濟並請

皇上於江南金陵城外諸將中酌派一人統帶大兵前

往浙江協剿蓋金陵久經賊陷克復猶可徐圖
而浙江爲糧賦重地保全不容稍緩至李元度
所帶勇餉積欠甚鉅當先由湖北豫籌銀一萬
兩並帳房軍械解赴該營以爲拔隊起行之資
儻至浙以後勇力不敷臣當隨時添募咨送赴
浙庶令其盡心營務可無竭蹶之虞奏入

命軍機大臣傳諭福興耆齡曰江西大股賊匪已由

廣豐將至玉山該處爲浙江門戶防勦實屬緊要道
員李元度在貴溪一帶勦匪頗爲得力若調往玉山
則廣信一帶空虛亦恐顧此失彼李定太爲江南軍
營出色人員現在進賢賊已出巢可調李定太帶兵
速援廣豐卽可與饒廷選分投夾擊以保江浙門戶
著福興耆齡酌量情形卽飭李定太探賊所向移緩
就急以固浙防至前諭耆齡就近撥兵赴援諒必遵

旨辦理福興退守廣信如賊勢盡趨廣豐亦當相機
前進會合追勦不得藉口兵單一籌莫展致令賊勢
蔓延

初七日癸未德興阿翁同書翰殿華奏言江浦縣

城被賊占踞聚黨屯糧意在固守二月二十九
日總兵安勇等四面環攻該逆由城南撲出二
千餘名勢甚猖獗經參將魁霖等帶領兵勇直

前截殺都司王希堂等分路包抄臣等揮軍急

攻西門及求雨山一帶開礮轟擊賊不能支紛

紛敗回海全等乘勢掩殺共斃賊七八百名槍

斃首逆洪秀泉之姪洪芒涓一名餘賊遁回城

內城外賊匪悉就俘執墜濠死者不計其數復

令兵勇緊攻南門適九洲洲出賊千餘羅玉斌

等分路迎勦直衝賊陣砍斃黃衣悍賊二名殲

賊數百名溺死無算臣鞠殿華當將求雨山賊營先後攻破海全等復縱火延燒南門外賊營富明阿等帶領兵勇由西北登梯上城賊衆拌死衝出各路兵勇重重圍裏陣斬賊目數名賊衆驚潰兵勇四路搜殺落水淹斃者甚多當將縣城克復共計斃賊二千餘名生擒二百餘人陣斬僞國宗首級生擒僞將軍總制等多名所

有在事出力文武員弁可否擇尤保獎之處出自

逾格鴻慈奏入

上諭內閣曰此次德興阿等督兵環攻江浦克復城池所有在事出力文武員弁均屬奮勉著德興阿等查明保奏候朕施恩

初八日

甲申

晏端書奏言查甯國之黃池灣汴自

被逆匪竄踞以後方山之賊於二月十二日分股繞至紅楊樹直趨甯郡東路道員仲孫懋等分路迎擊殺賊甚多是夜該逆又糾合黃池灣泚蒲塘之賊數萬人猛撲鄧紹良派都司曹興隆等奮力鏖戰劉仁福先以伏兵擊倒馬賊十餘人賊勢大潰十四日該逆在馬家園一帶搭造浮橋欲與奎潭之賊併犯新河莊旋探知該

逆全竄紅揚樹灣汴一路情形稍鬆鄧紹良卽
密遣敢死士潛往灣汴賊營作爲內應一面派
令楊金榜挑選壯勇夤夜從新豐一路銜枚而
進遊擊張萬洪帶勇扼紮竹塘泰子甸又於清
水一帶河口派弁梭巡以防逆匪偷渡鄧紹良
親督大隊策應十五日該逆又以大股進犯紅
楊樹米興朝等軍憑營決戰貴廷芳等從方山

繞襲賊後夾擊攻破賊營十餘座餘匪逃至清
水潭冉正祥等又毀賊營二座傅振邦派令龍
正耀等前赴灣沚與楊金榜合隊楊金榜首先
越濠而進俘斬四十餘名將逆巢三座踏毀河
東賊援屬至時劉仁福從方山追勦而來袁青
雲等亦帶勇踵至會合衝殺斬獲尤多被焚被
溺死者數百名餘匪竄往蕪湖是日黃池之賊

紛紛從金柱關一路退竄鄧紹良飭令灣沚諸軍分兵進剿沿途踏毀賊營二十餘座當將灣沚黃池先後收復境內肅清查本年正月間金陵江北逆匪數萬人突竄黃池灣沚蔓延數十里逼近甯國郡城情形危急經鄧紹良督飭將士力扼要衝連戰皆捷幸得轉危爲安惟南陵逆氛甚熾且秣陵關業經克復金陵攻剿喫緊

皖南地處上游尤須防其復窺容俟南陵肅清
卽會商兩江督臣何桂清妥籌布置以維全局
再前次黃池失利鄧紹良先在南陵督勦救援
不及經臣請

旨交部議處現在黃池灣汜收復該提臣運籌決策均
合機宜可否

飭部免其議處遊擊楊金榜上年在婺源縣城潰圍而

出不能固守待援奉

革職留營茲收復灣沚首著戰功可否開復革職處
分其餘在事文武員弁兵勇容臣會同鄧紹良
擇尤保奏奏入

諭內閣曰金陵江北賊匪數萬竄踞黃池灣沚署提
督鄧紹良會同總兵傅振邦等先後督兵收復境內
肅清勦辦尙爲得手著鄧紹良等督飭將士實力防

勦並將南陵餘匪迅速殲除毋稍延緩署提督鄧紹良前因駐兵南陵救援不及旋即督兵攻克所有前旨交部議處之處著加恩開復已革遊擊楊金榜著開復革職處分其餘在事出力文武員弁兵勇著晏端書會同鄧紹良擇尤保奏

晏端書又奏言福建漳州鎮總兵周天受於本年二月初四日在涇縣軍營聞訃丁母憂請開

缺回籍守制並准張芾咨請奏留前來查周天
受在徽州軍營已歷五年勤勞懋著皖南軍務
全賴該總兵往來策應未便另易生手相應請
旨將周天受免其開缺改爲署理仍留皖南督辦防剿
俟軍務完竣再行回籍終制奏入

上諭內閣曰福建漳州鎮總兵周天受現在丁憂著免
其開缺改爲署理仍留皖南軍營督辦防剿俟軍務

完竣再行回籍守制

晏端書又奏言江右軍情自河口鉛山失守後
廣信玉山廣豐三路同時告警現在參將胡定
國一軍仍在廣豐力保危城遊擊楊國正駐紮
界首會同江山縣知縣余以增於二月十一日
禦賊於排山殲斃甚多廣豐城外賊衆日增楊
國正原帶兵勇僅一千四百名尙形單薄繆梓

添調兵勇七百名及婺源調回之浙兵一千五十名卽令移營前進以解廣豐之圍饒廷選隨令副將周萬遠統帶兵勇二千餘名自玉山進紮大南嶺與楊國正訂期於二十二日會攻廣豐正在出隊之際突有匪黨二三萬人從觀音橋遙擁而來各營盤前後被圍遊擊江長元把總王增貴陣亡我軍衆寡不敵撤隊退駐玉山

該逆旋由大南嶺沙溪兩路進撲距玉山均祇
一二十里饒廷選現飭各隊於玉山西門外沿
河一帶紮營再圖進取臣前次奏調浙營官兵
八百名由建平調回浙兵五百名並張芾派出
遊擊王恩榮統帶兵勇一千名先後前往策應
計可到齊惟廣信府屬賊勢蔓延二百餘里衢
防兵勇分赴玉山廣豐兩路數僅萬餘常開各

防節節空虛且甯防黃池灣汴雖已肅清南陵
賊氛尙熾添兵布置已屬不敷一時萬難抽調
臣現咨何桂清和春張國樑許乃釗酌撥勁旅
來浙惟程途較遠尙恐緩不濟急一面咨商張
芾續派兵勇交江長貴統帶馳赴玉山會剿再
據福建浦城縣知縣稟報江右股匪二月十六
日竄陷崇安縣之岑陽關現竄至該縣西南鄉

請兵救援查浦城爲閩浙咽喉前咨督臣王懿
德派兵嚴防並令道員梁恭辰由江山馳赴浦
城集團堵禦刻下情形萬緊當令楊國正酌撥
衝標兵四百名赴大竿嶺駐紮並由臣飛飭楓
嶺營閩浙官兵分途堵禦其界連處屬之龍泉
慶元雲和景甯等縣亦咨行處州鎮及該管府
縣扼要嚴防奏入報

初九日酉乙福興奏言沙溪對岸之賊從青田橋

洋口等處糾黨萬餘於南岸依山爲營欲竄北岸二月十九日我軍分道暗渡河南直逼賊壘撲進牆內斃賊一百五十餘名二十一二等日各軍潛渡進擊疊有斬擒賊向山後敗回據獲賊供稱此股實有二萬餘衆本欲竄犯信城因

官軍堵剿甚嚴擬俟攻陷廣豐併力以圖廣信等語查廣豐被圍待救甚急總兵饒廷選前次赴援未能前進臣卽派彰武奇兵等營前往復派兵勇二千七百人隨同協剿該總兵飭副將周萬遠分軍進紮大南橋一路爲廣豐遙作聲援臣以沙溪之賊可由高嶺直截大南橋之後慮其爲賊所乘當函致該總兵先將沙溪一股

會合勦除卽可併力以援廣豐並囑飭大南橋
一軍進攻沙溪果勝等營從北岸過河夾擊嗣
據該總兵函稱已飭周萬遠約期會勦不意周
萬遠一軍二十二日在大南橋遇賊接仗全行
退挫幸縣丞屈蟠一軍扼險堵禦該逆未敢跟
追現在玉防喫重請撥軍應援查沙溪防兵僅
一千數百人信郡之軍存城者祇一千二百餘

人均屬無可抽撥日來金谿之賊復竄至黃沙
港地方分股由上高州一路竄閩省岑陽關撫
州賊黨亦將東竄是下游堵剿未能稍鬆適浙
江撫臣兩次撥兵八百人並調徽防兵勇一千
餘人來衢協剿臣已照會饒廷選迎提各軍嚴
扼玉山仍一面飛咨撫臣耆齡趕派整隊數千
馳赴廣信隨同攻擊惟廣豐被圍日久恐鉛藥

垂盡各路援兵緩不濟急 臣嚴飭各將領就現有兵力先將沙溪對岸賊匪殲除以期進解廣豐之圍奏入

上命軍機大臣傳諭福興晏端書曰福興駐兵廣信饒廷選扼守玉山自當力遏兇鋒惟據奏稱必須將沙溪一股剷除方可併力進援廣豐廣豐城小兵單被圍日久設有疏虞則賊繞越廣信由江山一路入浙

饒廷選專保玉山儘衢州有警該逆順流而下無險
可扼全浙皆爲震動自當以救援廣豐勿使竄入衢
境爲要務昨令福興調李定太一軍赴援廣豐著該
將軍飭令迅速前往據奏晏端書撥兵八百名並調
徽防兵勇千餘人至衢州協鞠自應分守江山衢州
以遏賊鋒豈可全行調往玉山以致顧此失彼饒廷
選係衢州本鎮前此赴援廣豐未能前進此次福興

派勇助勦僅令駐紮大南橋遙作聲援又復敗衄似此毫無把握深恐貽誤非輕著晏端書速飭該總兵督兵進勦並布置江山一路毋使該逆有隙可乘福與卽飛咨耆齡將續派江西官兵催令趕緊赴援一俟到防福興亦當視何處喫重親往督勦不得株守廣信坐視賊匪蔓延晏端書統轄全省當此軍務喫緊之時尤須調度合宜方能有備無患儻用人不當

防堵稍有疏虞恐不能當此重咎也

初十日

丙戌

耆齡奏言新淦賊匪疊經水陸弁兵

渡河進攻賊匪不出二十七日甘肅安肅道劉于瀆督率江軍由樟樹鎮抵淦二十八日劉于瀆飭各軍過河紮營並令前署新淦縣知縣李作士等集團助勦戰船排列河面開礮疊擊賊於是夜潛開東門逃竄劉于瀆督軍追勦參將

劉培元等率勇繼至逐北二十餘里殺賊甚多
餘賊向樂安竄去當將新淦城池收復豐城縣
白馬寨賊壘初八日經李定太派隊全行踏毀
其撫州大股逆匪分竄餘干安仁貴溪等縣正
月二十四日悉趨馬鞍山楊林橋一帶二十五
日李元度率勇往勦互有殺傷該逆卽竄弋陽
港日二十七日竄擾河口鎮西安將軍福興回

守廣信府城令李元度接防弋陽二月初二日
河口之賊分擾鉛山初五日竄撲廣豐並擾及
廣信府城對河撫州續至之賊約數萬人屢思
渡河竄犯郡城經李元度等派撥兵勇及臣前
調同知康國器所帶戰船於黃河港等處截擊
殺賊數十人至百餘人不等查此股逆匪被擊
退回撫州改犯東路貴溪弋陽防兵七千二百

餘人並續派之奇兵等營二千二百餘人原期扼守信郡以護閩浙乃逆衆竟由貴溪之楊林橋弋陽之港口直趨河口鎮分犯鉛山廣豐不但信郡數處受敵閩浙且復震動臣已酌撥參將劉芳貴寶勇一千二百名前往貴溪接防又調長左等營兵勇二千餘名馳赴廣信由李元度酌撥防守弋陽餘俱調赴玉山會同饒廷選

等軍至廣豐鉛山河日步步進擊以期肅清東
路奏入報

聞

十一日丁亥何桂清奏言粵逆東趨浙江軍情喫

緊前奉

諭旨飭調金陵大營兵勇星速赴援遵卽會商和春張
國樑派撥兵勇二千一百名赴浙援剿惟江南

大營自攻破秣陵關後剋日進剿雨花臺未可
鬆勁卽將派防東壩高瀆兵勇二千四百餘名
調回以厚兵力仍咨商張國樑另撥兵勇接防
東壩一帶要隘茲據張國樑函稱東壩高瀆兵
勇現旣調回該處地大兵單深爲可慮擬再添
募壯勇三千名前往扼守臣與張國樑意見相
符業經函覆請其就近添募妥籌辦理所需經

費由臣設法措給以資飽騰奏入

上命軍機大臣傳諭德興阿何桂清曰江南官兵攻破秣陵關後卽日進攻雨花臺勦辦正當喫緊高淳東壩爲內竄之路亦未可空虛所稱募勇扼防恐係烏合之衆未經戰陣難期得力現在江北官軍業經克復江浦如有可撥兵勇著德興阿酌量調撥不拘二三千名交和春張國樞妥爲布置既可節省募勇之

費而防勦更爲得力能否調撥之處仍著該大臣妥
籌酌辦

十三日

己丑

和春奏言官軍自克復秣陵關後二

月二十一二等日李若珠等冒雨督師將三山
營江口賊壘二座先行奪毀殺賊甚多隨卽從
板橋杏花山常固山一路移營進占與三汊河
逆壘對峙該逆潛於善橋之西築壘設卡拒我

東趨二十六日李若珠等分兵三路會搆賊營
並飭遊擊向奎等佯攻西善橋賊壘以牽制之
我軍齊抵三汊河參將劉萬德馬德昭搶渡過
河殪執旗逆目數名餘皆披靡李若珠親督馬
隊斃賊多名將該逆新築營卡踏平乘勢直撲
三汊河老巢李若珠密令馮觀勝等帶領軍士
或十數人或數十人於三汊河旁作爲探路樵

汲之狀該逆見我人少卽分投出逐我軍誘其
離巢漸遠伏兵齊發該逆回奔馮觀勝戴佐英
搶過浮橋三道大隊填濠競進賊營七八百人
悉數殲除三汊河東十里爲西善橋又東爲小
行該逆踞守與三汊河互相犄角周天培戴文
英密飭馮觀勝戴佐英帶兵百人卽用所得賊
營衣幟馳赴西善橋一面派遊擊馬騰霄等在

善橋分路設伏馮觀勝等徑奔賊營該逆營門甫開我軍刀矛火器一齊衝入賊匪不知官兵多寡奪路狂奔馬騰霄等四面兜圍殺賊約以千計立將西善橋老巢攻克周天培等將沿途賊卡十餘座一律焚燒轟斃淹斃之賊不可數計周天培當派姚爵階等直搗小行殲賊無遺遂將小行逆巢奪據李若珠亦部署士卒從三

漢河西北進攻大勝關派副將劉季三等分隊
環攻該逆始猶抵拒嗣見寡不敵衆棄營而逃
計殲賊五六百名此二月二十一日以後疊毀
賊巢大獲全勝之情形也臣與張國樑許乃劍
相商金陵形勢以太平神策等門爲左翼以兩
花臺爲右翼三山板橋爲咽喉三汊河西善橋
等處爲脈絡今左右兩翼均已翦除自大勝關

迄小行數十里內壘卡皆平其勢漸成孤注應
卽由安德門石子岡以上抄出雨花臺之前接
築長圍全局俱歸掌握當由張國樑親往西南
相度形勢二十九日派李若珠一軍由落星寺
至西善橋聯紮十三營以固後路三十日派周
天培戴文英兩軍由西善橋至安德門扼要紮
營該逆由雨花臺傾巢出撲南門水西門又各

出悍匪三四千意圖抄襲我軍分路追勦戴文
英指揮將弁直擣中堅斃黃衣逆酋數名馮觀
勝等左右馳突殲殪甚衆南門一帶逆隊經李
若珠等帶兵痛勦殲賊七八百人張國樑已督
兵紮營包過雨花臺卽可漸抵上坊橋賴鎮海
督飭艇師亦於是日聯檣上駛行經九洲草
鞮峽等處賊匪聯築礮壘我師乘風揚帆施放

大礮轟塌該逆望樓一座並毀其礮隄斃賊無數水師現已排泊落星寺江濱與綠營聯爲一氣三月初一日張國樑督同李若珠等正在催趨夫勇由石子岡左右築營突見賊衆自雨花臺聚寶門蠡擁而來當飭劉季三等各帶勁兵設伏俟逆衆漸近將賊隊橫衝爲二雨花臺山岡又出逆匪數股竭力相持周天培馬德昭躍

馬直前短兵相接斃賊不計其數我軍新營均已蕨工此連日水陸各營直逼雨花臺接仗獲勝之情形也查逆渠占踞金陵稽誅六載今幸仰仗

天威將士用命由三山直達雙橋鳳台以至上坊等門悉爲我守實屬數年來未有之氣象此後能斷城賊接濟其勢自難久踞京北一路五十餘里

營壘之外濠牆迤邐聯屬該逆斷難飛越西南
一路我師又已聯紮四十餘營銜接八十餘里
刻下德興阿大兵克復江浦進攻九洑洲賊巢
臣等已飭賴鎮海嚴督水師晝夜巡防以杜賊
船北竄一面督率鎮將迅圖收復金陵陣亡之
五品藍翎把總李光明應請

飭部從優議卹奏入

上諭內閣曰官兵進擣金陵連奪逆巢營卡直逼雨花臺疊獲大勝所辦甚屬得手仍著和春張國樑等督飭諸軍迅圖攻克金陵擣穴揜渠以副殷望陣亡把總李光明著交部從優議卹

和春又奏言臣奉

旨飭調壽春鎮總兵鄭魁士赴江南軍營聽候調遣另揀大員前赴廬州更替查鄭魁士出師日久屢

經大敵疊受重傷今在廬州既與諸鎮將意見
不合應卽遵調鄭魁士赴江南軍營助勦廬州
爲北路咽喉自當揀派得力大員前往臣與張
國樑許乃釗籌商查有現駐東壩之湖北提督
德安堪以派往俟行抵廬州再飭鄭魁士交卸
前赴金陵其東壩防守事宜查有副將魯占鼈
堪以前往接辦奏入

上諭內閣曰湖北提督德安著前往廬州會同福濟辦理軍務鄭魁士著赴江南軍營協同勦匪鄭魁士所帶廬州兵勇卽交德安統帶其壽春鎮總兵一缺著福濟派員署理